

KERWEREDE 2016

Begrüßung (Roland)

Servus Grüzi guden Tach und Hallo

ja, ihr seht ich bin schun were do

Ruck zuck war des Johr vorbei

also gebds die Kerwered mol widder nei

Wie immer wars en große Graus

keener rickt die lusdische Gschichde raus

Also muss ich immer lausche, froge, Spione entsende

um des dann am Schluss zur Kerwered zu vollende

Mo witzisch, mol bekloppt, mo zum nodenke gedacht

egal, ich hab mer beim dichte en Wolf gelacht

Im Nachgang war dann manches doppelt gut

bei annerem fliegd der weg de Hut

Aber zurick zu Thema, de Schorle rufd

jetzt zeigt ihr mol wie ihr heit groovd

Die Asslemer Kerwe Sie lebe...

Des war jo fers erschde mol schun net so schlecht

Des in laut dann werd des recht

Zum Übe grien er noochher Zeit

no jeder Gschichd kummt dann eiern Part ihr Leit

Un bisses soweit ist

damit a keener den schwere Text vergisst

Die Asslemer Kerwe Sie lebe...

Update (Roland)

„ Musik, Worscht un gude Woi

des kann nur Kerb in Asslem soi“

Sperrzeite, Weindorf, kee Musik un lauder so ein Mist

dann is des nimmer Asslem damit ers wisst

Musik, Worscht un gude Woi

Die drei Sache sin bei uns immer mit dabei

Des Komitee steht heit bereit

un verzehlt eich vun der letschde Zeit

Mit dem Marcel hammer jetzt wieder e Mitglied mehr

do druff trink ich jetzt mei Glas mo leer

Marcel willkommen im KKA

des erschde K steht fer Khaos, ja ne is klar

Äns zum Beginn sei hier erwähnt

a uff die Gefahr hin das jetzt ener gähnt

2016 war aus unsrer Sicht net ganz so schlimm

mer griehn des scheinbar a ruhiger hin

Keener hot sich uff de Hitt eingesperrt

oder hot im Wald wege de Ameise geplerrt

A des öffentliche Gekotze fiel in 2016 komplett aus

sogar de Geruch ist aus em Volkhard seim Bus schun wieder draus

Sogar de David hot de Hemweg komplett gefunne

un hot net de Rase als Bettche genumme
Unsern Methusalix hot sich ohne Träne über die Kerb gerett
is dann vergnügt mit de Uli ins Bett
Selbschd de Phillip konnt an sich halde
wollt net mer mim Kopp de Elfriede ihrn Torpfoschde spalde
Dank weniger Mädels im KKA bliebs a aus
dass die Kerl penne un flenne vom Narzschen Haus
Sunndachs nochem Umzug warn mer irgendwie alle platt
bei mir hot dann jeder en Sitzplatz mit Kaffee un Kuche gehatt
Un weil des Komitte a en Ruf hot zu verliere
gabs reichlich Schorle fer die Niere
Die Auswahl war reichlich un a groß
ich hat de Kihlwache uff de Stroß
So hammer dann de Sunndag ausklinge losse
un ham de gudde Asslemer Woi genosse
Doch statt Chaos traf der Tod uns 2016 in Mark und Bein
der holt zu oft die Falsche do kennt mer schrein
Helfer sind willkomme un a immer schön
daher trauern wir um unsern Herrn Karl Böhm
Seit dem 06.06. is er fort
mer wünsche es is en besserer Ort
Stets mit Asyl und Hilfe uns bedacht
gebt er jetzt vun obe uff uns acht
A de Schwarze Manfred, jahrelang Mitglied im KKA

ist jetzt schon e zeitlang nimmer da
Als passives Mitglied un guter Geischd im Hinergrund
tat er immer sei Begeisterung fer unser Kerwe kund
A ihm wolle mer gedenke
indem merm hier e paar Zeile schenke
A de Herr Hochstetter sei hier genannt
mit seiner stets spendable Hand
Fer eich drei mit dem höchsten Respekt
wern jetzt die Gläser in de Himmel gereckt
Herr Hochstetter, Herr Schwarze, Herr Böhm
wenn ihr noch do werd, des wer schön
Die Asslemer Kerwe Sie lebe...

De Buhhhhhhhh (Roland)

Ihr erinnern eich ans ledschde Johr an dere Stell
do unne stand äner mit ne Kamera in XXXXL
Also XXXXL der Mann der den Blick uns filld
die Kamera war jo halb so wild
Komisch an der ganze Dramaturie
wie kummt der Kerl dann jetzt do unne hie?
De Markus, so stehts in unserm Programm
war eigentlich mit dem Kerwered lese dran
Er kann leider net weil er noch en dringende Termin hat

sagt der mir Samschdags Abend glatt
Den die Musik muss er schaffe vum Umzugswache runner
sunscht gebts mit Parteeey.de ganz viel Kummer
Sprachs und ward nicht mehr gesehn
un schon wars um mein Vorleser do hobbe geschehn
Denn wie immer sollt des ener vun unsre Junge mache
do hot de Rest dann a was zu lache
So ziemlich alle warn schon do obbe die arm Sau
un stellde sich hier fer eich zur Schau
Mussde fremde Texte uff pfälzisch lese
ab un an klang des wie großer Käse
Daher is es bei uns Brauch die Red a ins Netz zu stelle
um bei manschem vun eich de Zusammenhang zu erhelle
A im leschde Johr hatte mer so en Kandidat
„was mach ich ohne Stimm“ frod der mich um Rat
„Mike, les langsam, sauf net soviel un schrei vorher net so rum“
„stell dich net so a, du bisch doch net dumm“
Un „net dribber nodenge, efach lese“
des is mein beschde Tip fer den gewese
Un während de Mike sei letschdes Hemd verbabbeld
kummt de Massa plötzlich were o gedackelt
Er bahnt sich den Weg durch die Menschenmassen
ich kann des alles gar net fassen
Als ob nix wär und und alles wär gut

steht der jetzt do unne mit de Kamera des ist Mut

In meine Age en große Dorn

war de Markus mit seine Kamera plötzlich ganz weit vorn

Am End stand der Kerl direkt an de Bihn

un denkt sich bestimmt „die griehn des a ohne mich hin“

In aller seeleruh hot der Bild um Bild geschosse

un hot fer alle sichtbar des netlese müsse genosse

De Schorle wollt mein Hals net mehr nunner

so macht der Kerl mir jetzt hier Kummer

Ich hab den dann immer vun obbe runner gedisst

als hät der des net schun vorher gewisst

Wer uns so korz vor knapp versetzt

über den wird nadirlich ostänisch gehetzt

Hab extra noch Nachts die Red umgedicht

un bin recht knagisch mitem ins Gericht

um des noch zu toppe

hab ich ogfang den mit Buhhhhh Rufe zu foppe

statt Markus ruf ich nur noch Buhhhh

un des iber die ganz Kerb immerzu

um dem ganze zu entkomme

hoter sich selber in die Pflicht genomme

in 2016 macht ers ganz allee

un ich geb dem die Thema vor, ei des wird schee.

Drum ruft jetzt alle es ledschde mol Buhhhh

un hert dann gut unserm Markus zu

Durch die OP is em Markus es Schreie und Trinke verbote

darum hab ich ebe gerad de Philipp und de Dominik als Verstärkung agebote

Beim Schreie is de Dominik dabei

de Philipp kipp derweil de Schorle nei

Die Asslemer Kerwe Sie lebe...

De Informand oder CEibela (Markus)

In Asslem gebts e Inschdidution

egal was du weschd der wes des schon

Jed Johr um die gleiche Zeit

ballerd der uns zu mit Infos ihr Leit

Nix genaues wes er zwar net

aber des muss uff jeden Fall rin in unser Red

A des nofroo bringt net viel an Fakte

weshalb es a kee Gschicht in die Red rinpackte

Manches wär schun fer eich un uns en Genuss

doch nähere Fakte sin bei uns e Muss

Den wenna dann zu weit vun de Wahrheit entrückt

sin die Leit net sehr verzückt

Aber ens kann ich hier noch korz verkünde

wie er bei letschde Polizeieinsatz war am ergründe

De Roland hat nix böös gedacht

hot sich mit seine Hundle uffgemacht

Weils drauße dunkel war

ham die zwee jeweils e Blingehalsband getraa

Plötzlich vun rechts aus dem Dunkel der Nacht

hot en ener ogemacht

„Roland, Roland, kumm mol bei

dohinne bei eich do steht die Bolizei“

„mineschdens drei Eisatzwache steh do hinne uff de Gass

ich glab die mache jetzt keen Spass“

„un a zwee Krangewache sin gekumme

ham glab ich a jemand mitgenumme“

„un dein Nachbar is net gefloh

ich glab der is jetzt dro“

„warum hoschd du dann des Licht an deine Hunde a?“

„kumm mer schleiche uns mol näher dran“

Um de Eichern zu beruhige wurd dem Wunsch entsproche

un um die Tarnung zu wahre nur noch ganz leis gsproche

Statt Gassi gehe hieß es dann

die schleiche sich an de Amselweg an

„mach doch des Hundelicht mol weg

sunscht verliert des Schleiche doch ganz sein Zweck“

Bei Sinkpiehl wurd ums Eck gelurrt

do ham die Kappe grad de Nachbar verzurrt

Ham den glei ins Audo gsetzt

un sin dann mit em fort gehetzt
A dem sein Rucksack war sehr interessant
der ene Polizischd hot den in seiner Hand
Los geht die große Sause
alles was do drinne is kummt jetzt no auße
A do ist net bekannt um was es ging
doch ershd mol ist der gute Ruf dahin
Schlimm wars sicher net ihr Leit
am nägschde Dag war schun were Freizeit
Den de Nachbar is were durchs Dorf marschirt
un wurd diesmol net vun de Polizei flankiert
De Eugen war tagelang noch neber seine Socke
der ganze Polizeikram dud ne sichtlich schocke
Un schlimmer noch keener wes um was des ging
er macht als ob sei Lebe do dro hing
Ei Eichern die Polizei war doch do
nägschd mol musch bei dene mo fro
Un wann de dann Fakte hoschd gewunne
dann werd dei Gschicht in die Red übernumme
Die Asslemer Kerwe Sie lebe...

Die Taliban auf 4 Rädern (Markus)

Was IS, Taliban und annere Terroriste nur mit Bombe schaffe

sin des in Asslem vierrädrische Waffe

Die Siedlung is de Gazastreife

wu immer were Quads un Audos kreise

Mit lauter Musik und zuckendem Fuß werd alles ibberrollt

so das die halbe Siedlung grollt

Selbschd de Eibel Manfred war schun sauer

legt sich heimlich uff die Lauer

Hot den ene Kerl sich mol gekrallt

ei nee, der hot dem nadirlich keene geknallt

Aber denooch hot der sicherlich gewisst

das unne beim Adolf uff de Brick langsam besser ist.

Roter Cosa, weißes Quad und en dunkle als a griener BMW

ich kanns eich saa des dud bestimmt gut weh

Die sieschde net do herschd die schun

und net nur wegen dem brumm, brumm, brumm

Die Musik bis zum Oschlag uffgedreht

herschd die schun wens in die Kappel geht

Das die a net normal fahre kenne des is klar

darum ist des Gasbedal jo dra

Vollgas un Bremse immerzu

jetzt quitschtend in de Kurv, juhu

Dodezu wie obe gesaad

der komische Bum, Bum, Bum und Utzutzutz Salad
Musik kann mer des net nenne
mer kann werklich nur bum un utz erkenne
Dann finne die Helde des scheinbar noch toll
wenn der Karre röhr wie doll
A de Leo ist so en Kandidad
der sein Karre wild durchs Dörfische jad
Doch der fuhr sein griene BMW zum Schaffott
dennoch war des Ding dann ershd mol Schrott
Die Nachbarschaft proschdet sich zu
hot unverhoft jetzt ershd mol ruh
Lang wurds leider net genosse
do kam der mit dem rote Corsa um die Eck geschosse
Net so dick, mit Musik un gabuddem Auspuff aber genauso laut
als Anwohner fährschd do aus de Haut
Un wann der de Mame dann noch des Quad entfiehrt
un ständisch no dem Gasgriff giert
Selbscht im Stand un im Ausrolle
macht der mit dem Griff de Dolle
Egal was fer ein Dag, zu welcher Zeit
wann de Leo mit dem Quad kummt wes Asslem Bescheid
Ich will jo jetzt net hetze
aber vielleicht will der die Nachbarn domit vergretze
Un das des a anersch mit dem Gschoss geht

sieschde wann die Mame gechillt die Runde dreht
Aber de Leo un de FP7 hamm a des Motto vun de Stroße do net kapiert
do wird bis zu de Kurve mit Vollgas flankiert
In de Kurve merke die Asse dann
die Brems is mit gudem Grund do dran
Un weil die jo do wohne konnte die net wisse
das die Stroß sich dud no rechts un no links verpisse
Drum ihr Heitzer nemmt eich des zu Herz
wenn er e Kind umgefahre han gibt's höllisch Schmerz
Des Lebe des ihr kennt is dann vorbei
un los geht die große Zeterei
Doch des Jammere is dann fer die Katz
un alles wege dummer, unnötiger Hatz
Also macht langsam, dreht die Musik runner
un alle ham viel wenischer Kummer
Die Asslemer Kerwe Sie lebe...

Dem König (Markus)

In Asslem gebts en Mann
dem ma net genug lobe un danke kann
De Roland hots uff em Neijohrempfang verbockt
un hot wohl net uff de Knie vor dem gehockt
Wagd der doch namentlich e paar Leit zu benenne
un macht als ded der „de König“ net kenne

En Rickblick fer die die net do ware
dann kennt ehr die Geschichd un seid im Klare
Neijohrsempfang 2016 im Kelterhaus
die Jutta, de Philpp und de Dominik die falle aus
De Maier sad ich mach des ihr Leit
ich üb dann schun fer die Kerwezeit
Den es wartet net nur Gruß und Dankeswort
a die Gewinner vum Luftballonwettbewerb sin vor Ort
Un was mach de Maier mit seier Redezeit
dankt allene die immer stehn uff unsre Seit
Manche als Verein genannd
annere als Einzelpersonen, warum liegt auf der Hand
Eigentlich hot er werkllich an alle gedacht
aber er hot die Rechnung ohne de Wischdigsde gemacht
Glei no dem Neijohrsempfang
fing des Rumgezeter an
Er war zutiefst bestützt
dem Roland sein Dank sei stark gekürzt
Annre sin viel wenischer present
ob de Roland a an sowas denkt
Un wenn mer net in Dank erschalle
kummt an de Kerb keen Peiner mehr in seine Halle
Un wie unsern Maier halt so is
gabs defür a glei en kleene Diss

Den der hot jo gar net glei kabiert
das des den arme Mann werklich so tangiert
Tief erschüttert in Mark und Bein
ließ er die diskutiererei dann sein
Sicher simmer immer froh
wie de Mops im Haferstroh
Wenn Helfer uns zur Seite stehn
un mit uns die Wege gehen
So wurd die Idee geboren
heit gebts hier Dankesworte uff die Ohrn
Drum ruf ichs heit vun de Büh e runner
des vertreibt dann all dein Kummer
Vum TVA bischd jetzt der Mann
der als bisher erschder in die Kerwered kam
Lieber König sei dir stets gewiss
dei Fußvolk dir immer treu un dankbar is
Mit Hofknicks und viel Trallalla
Grüßen wir dich, König Norbert vom TVA
Die Asslemer Kerwe Sie lebe...

De Flüchtling (Markus)

Asslem am Mittag ihr Leit
de Roland un sei Hunde ham jetzt Gasszeit
Mit Kind un Hund uffem Weg nach Haus

saust plötzlich von rechts was helles raus
Flitzt no links in de Lercheweg nei
die Annika mähnt „des war de Carlos, o wei“
Ener fun de Nachbarshunde
was macht der dann do zu dere Stunde
Erschd mol die Hunde weg un in Ruh mo gucke
do kummt schon die Kerstin und is kräftig am schlucke
„De Hund is weg, de Hund is weg de Andre der flippt aus“
ich hat nur korz die Deer mol uff un schon ist der Hund do naus
Gemeinsam gings dann uff die Jagd no dem kleene Hund
die Kerstin hot Muffe un dud des kund
Der hot so Angst den finne mer nie
der macht sich vor Angschd schon faschd ins Knie
Ei warum rennd der Dabbes dann weg
wenn ich so en Schiss hab hot des doch keen Zweck
A die Eistalstroß werd thematisiert
wenn de Carlos sei Lebe do egalisiert
Hot nur gefehlt das en Raubvogel den Hundi entfiehrt
so schlimm war se traumatisiert
Plötzlich herschd am Viermamend
als wenn de Schumi über de Hockenheimring rennt
Laudes Motorheule kummt immer weider in de Ort nei
de Roland hot erschd gedacht de Leo hätt frei
Doch dann is es em uffgefalle

es fehlt die Musik zum Dorfbeschalle
de nägschde Helfer kam herbei
de Andre flog ins Dorf schneller als de Bolizei
tritt seim arme Auto so in Kreuz
alle aus em Weg ihr Leutz
steigt aus un is a richdisch druff
macht mit seine Fraa e Fässer uff
doch schnell wurd sich dann uffs wesentliche konzentriert
un bei de Suche hot er jeden Gang vum Auto ausprobiert
die Straße ruff , die Strosse runner
immer größer wurd de Kummer
bestimmt zwe Stun sin die rum wie e agestoche Wutz
de Carlos sucht derweil bei Weinmann Schutz
hockt gemütlich bei dene unner ihm Balkon
un denkt sich heimgehe wär langsam e Option
a die Weinmänner ham sich des gedacht
un ham e Rundfrog „wem gehert dann der Hund“ gemacht
am Ende wurd dann alles gut
un a beim Andre verliert sich schnell die Wut
Nun is de Carlos wieder daheim
un lässt hoffentlich des ausbüxe sein
Die Asslemer Kerwe Sie lebe...

ZUGABE: De Dampfplauderer (Markus)

Die Kerwered die steht
de Kopp der qualmt un nix mehr geht
Doch dann de Kerwedunnerschdag
mer ham gedacht uns trifft de Schlag
Iberall sin die Leit uff hab Acht
„was hanner dann mit dem Dampfplauderer gemacht?“
Am jammern und heile werer gewes
mer hätten wohl des helfe un alles an de Arsch drage vergess
Geplant war die Geschichte hier eigentlich net
doch wann ener es unbedigt so will griet er jetzt sei fett
als ded man vor jedes Mikro zerre
hert man dauernd irgendwu rumpläre
Eröffnung, Beerdigung, Jubilare, nix is vor dem sicher
bei manche herscht schon hinner vorgehaldene Hand Gekicher
Immer in de vorderschde Reih an Nummer eins
ja, so isser, genau des is seins
Vor Johre hoschd die Chance genitzt
bisch vum Komitee devugeflitzt
Freiwillig hoscht genumm dein Hut
heit laafts zwar annersch aber gut
Un zu deiner Erinnerung du Leucht
Keener vun uns hot dich verscheucht
Also her uff uns im Dorf zu disse
weil viele es jo besser wisse

Unser Generation die is immer bereit
steht zu ihm Wort, zu jeder Zeit
Wenn mir saage das mir was mache
dann losse mirs a richdisch krache
Un wanns ener doch mo net gerisse griecht
dann sicher keener vun uns flieht
Gemeinsam simmer bärestark
un glab mer des is keen Quark
Name wern heit net genennt
heit is Kerb, mer wolle net das ener flennt
Darum solls des ver heit gewese sei
jetzt schenk ich mer mo ener ei
Des Kriegsbeil is hiermit vun uns aus vun de Gass
un ich mach mer de Hals jetzt nass
Die Asslemer Kerwe Sie lebe...

Ferdisch (Roland)

So do bin ich es ledschde mo ihr liebe Leit
fer en fette Applaus fer unseren Markus wär jetzt Zeit
Moie kennt er widder kumme
mer sin dann a do un ham die Schubkerch mitgenumme
Lossens uff de Langgass krache
un mache ganz viel coole Sache
Luftballonwettbewerb, Schubkarchrenne, Firmenlauf
un Preise gibt's bei uns zuhauf
A de Michel do dribbe is dann ganz gespannt
wer em dann is vielleicht defugerannt
Letschd Johr nur Nummer zwei
Is er diesjohr wieder als Topfavorit debei
Mim Messe zwische de Zäh
were mer bei dem moie nur noch des weiße in de Aage seh
Beim Armin wird am Dienschdag dann geflennt
wenn die Kerb dann ver e Johr mo widder pennt
A mir sin no dene 6 Dag komplett im Arsch
wobei wenn ich eich so oguck, wemm saagschs
Hier sinner mittdrinn statt nur dabei
des gebts nur bei de Asslemer un ihrer Feierei
Darum wünsche mir eich noch sehr viel Spaß
bei unsre Kerb uff unser Gass
Jetzt is es gepackt, Applaus

un ich sauf jetzt mei Glas noch aus.

Es Kerwekomitee sagt artig Dange

un geht dann wieder ans Schorletanke

Die Asslemer Kerwe Sie lebe...